

# BROP GUILTS NE PXEEL PABL LO TIMOTÉ

---

**1** ¡Diuzh Timoté!

Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëeb xnëz Jesús.

<sup>2</sup>Laa naa rxel stib guits rii lo luu i gon xin; xin rne naa lo luu sac rzaac naa luu zig tib xpëed naa. Mine racladz naa ni rnab naa lo Dios men ne nac Pxoze, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

<sup>3</sup>Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacnien me luu. Dib zdoo naa noxco naa zana naa mine rnabey me, zigne bioxcoque grë xmengoldoo naa güeynal zhow.

<sup>4</sup>Zeene rsoladz naa blactaa roon luu zeene wbi naa i, zoot naa tebaa zha ganniob naa luu stib; zeena tsonley zdoo naa. <sup>5</sup>Ni rsoladz naa scataa dib zdoo luu rliladz luu Dios; lëëdaaque xnanit luu Loid, ni xniaa luu Eunis, ni nanpaa naa scataque dib zdoo luu rliladz luu me.

<sup>6</sup>Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡Ib csaand luuw! <sup>7</sup>Sac gon, laa Dios rneedz zhiEspíritu me lo ne, parne sodziebdraa ne, parne dziaapraa ne xfuerz me, gleynieraa ne samiech ne, ni tsabiiniraa ne.

<sup>8</sup>Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdga luu ne znu nioogyu naa nu, loxaque ne rliladz naa me. Sinque bloo zdoo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne. <sup>9</sup>Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuu ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

<sup>10</sup>Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap

guielgut, ni bиаadlu me ganle parne ygaa miech tib guielmban ne gdzind dze lozh, none gliladz zho Xtiidz Ndzon me. <sup>11</sup>Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa gre guiedz zaatne nodraa zha Israel, gaseed naa zho zha naca; <sup>12</sup>mincocxe waa znutaa gre ncuane nodeed naa. Per ni lalnu ib rtoladzd naa, sac wen wen nan naa cho nac men ne riladz naa, ni nan naa mesi zrieelo yquiaanap me naa nitnezd naa haxta gal dze ne laa me guiaad.

<sup>13</sup>Bien, gueynal gre mine pseed naa luu, sac gon min co nac mine rquiin. Tiblique bliladz Dios, ine bleynie samiech luu zigne no dziuun ne ne nac ne zha ne no xnéz Jesús. <sup>14</sup>Espiritu Sant men ne nacie ne, me yquiaanap luu, me gacnie luu ib csaand luu zhiwseed Dios, ib csaand luu dziin ne bzo Dios luu gun luu.

<sup>15</sup>Nanlaxe luu ganle zha been zha Asia, grese zho bzozit lo naa; zig nac Figel, zig nac Hermoj, mbe psaan zho naa. <sup>16</sup>Sangue Onesifr, rnab naa lo Dios yquia zdoo Dios me gre menlidz me, sac blactaa biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me naa; <sup>17</sup>sinque zigne blanso me lad guiedz Roma nu, pquiaguib me naa haxta bdziel naa lo me. <sup>18</sup>Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grese miech gacredz lo Dios.

### Dziits so Timoté lo Xtiidz Dios

**2** Xin, sangue luu gon tibaque squi dziits bzo lo Xtiidz Dios, gon ganle Jesús noxco grese zhizhgab luu.

<sup>2</sup>Grese mine gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech. <sup>3</sup>Ib gacmband luu zeene noyan luu gre pe guielne, sinque bioxco been xtsiin Jesús zigne no gun luuw, masaque been cuent xmenguiib me nac luu. <sup>4</sup>Sac gon, tib zha ne nac menguiib, grieelod seeb zho pe stib lo cuent ne nacd xtsiin menguiib, sac none nsin so zho gun zho tel pe nac mine rnee men ne rnabey zho.

<sup>5</sup>Bioxco been mine rnee men ne rnabey ne, zig run zha ne rie tib lo wguit; sac zha co telne tsoxcod zho quit zho zigne nacpaa lo wguit, ycaaniad zho premio. <sup>6</sup>Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho.

<sup>7</sup>Mine blozh bzet naa nu, blooniew guic luu, ni Jesús nac men ne gneedz guielbiini lo luu guien luu zha naca.

<sup>8</sup>Tibaque psoladz ganle cho nac Jesús, zha brieequia me lo xtii rey David, ni zha brieegan me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho. <sup>9</sup>Ni ne nonecxe naa Diidz Ndzon rii waa, gane nroob guielne ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu. <sup>10</sup>Laa naa quiaxecw mine quiaeedtaa naa, zeena grese zha ne bzooblole Dios gliladz Jesús, grieele

yquiaadiag zho zha laa zho lo doḷ, ni zha yгаа zho tib guielmban ndzon ne gdzind dze lozh.

<sup>11</sup>Ni znu gon naca:

Teḷne xnēzle me no ne zeene laa ne guet,  
ib zгаа ne guiobannie ne me.

<sup>12</sup>Niicle nroob guielnē dzian ne porne rliladz ne me,  
scagaa ible zdziḅ ne zaatne gnabeynie me ne;  
teḷne guiab ne runbeyd ne me,  
scaquegaa me ziaḅ me runbeyd me ne.

<sup>13</sup>Niicle teḷne riaanladz ne me,  
sangue me riaanladzd me ne;  
miḅne rnee me run mew, sac mesi rtsēēd me xtiidz me.

### Tsoxco Timoté grieequia xtsiin Timoté

<sup>14</sup>Bien, beencsoladz grē zha bets ne i, zha bzian ne i grē miḅ rii. Zig zobwi Dios ganle laa naa rso diidz lo luu, gudz lo zho tiḷdiidzniedraa zho miech grē godiidz ne paat rquiind; led ncuaane ndzinlida, loxaque rungüeta guic zha ne rquiaadiaga.

<sup>15</sup>Tibaque bioxco zaacse grieequia xtsiin Dios, mine noyḅn luu, zeena wen grieequia luu zeene laa luu gdziḅ lo me. Zigne nacse Xtiidz me, sca pseed miecha. <sup>16</sup>Yquiaadiagd luu grē wseed yozh, ncuaane ni lalnu paat rquiind; zha ne zianaḷ wseed co, zig zie dze laa zho rzozitraa lo Dios. <sup>17</sup>Lega nac zhiwseed zho zig nac grē guielguidz dox; sac teḷ guielguidz doxa, znuse rded miecha ni zha ne glana ible zet zho.

Zig nac Himené grop Filet, wseed co rleynie zho, <sup>18</sup>sac teḷ zha zianaḷdraa zho miḅne nac diidzli; rnee zho bleebanle Dios grē mengut. No palal zha ne rliladzle Xtiidz Dios, zeene ron zho miḅ co, riendraa zho dien pa miḅne gliladz zho.

<sup>19</sup>Sangue zha ne nlipaa no xnēz Dios, tsod pe nacne grieve zho xnēz me sac lole me ngab zho; zigne zhobneeque lo Xtiidz me zaatne rnee: “Runbey Dios cho nac zha ne nlipaa no xnēz me”; ni rneequew: “Grē zha ne nlipaa ngab xnēz Jesús, none csaan zho grēse guielntseeb.”

<sup>20</sup>Zaatne nac lidz tib zha ricw lēē, no grē xtsiin rotie zho miḅne niaa or, miḅne niaa plat, ni noquegaa miḅne niaa yag, miḅne niaa beḅ. Miḅne mazdraa niazh, miḅ co rquiin zho rio ncuaane row miech; laa miḅne beelze niaa, ga rgo zho ncuaane row ma. <sup>21</sup>Scaquegaa miech, zeene csaan zho grēse ncuaane paat rquiind, ible squiin zho lo Dios guḅn zho xtsiin me miḅne mazdraa nroob, zigne rquiin grē trast niazh co.

<sup>22</sup>Nac lo guielnguieg, ndal grē ncuaane ndzinlid rio guic miech run zho, sangue luu gon tsienied grē ncuaan co guic luu, bioxco zaacse wban, dib zdoo luu bnalo Dios, inē bleynie grēse samiech luu, tiḷnied luu zho; grē zha ne squi nli mbe zdoo, rbedz zho Dios, zaacse wbannie zho. <sup>23</sup>Ib yquiaadiagd luu grē godiidz ne paat rquiind, sac gon loxaque runctila miech.

<sup>24</sup>Zha ne squi run xtsiin Dios, nodne tso zho dien pe tildiidz zho; sinque none wen gac zho lo grëse miech. None guien zho zha cseed zho miech; ib guieednied zho miech, <sup>25</sup>ndooladz gac zho gnee zho lo zha ne rlëënie Xtiidz Dios. Ni scagaa Dios cxobnia guic grë zha co, yguudz zdoo zho csaan zho grë xquielntseeb zho, gacnan zho mine nac diidzli; <sup>26</sup>zeena tsaa zho biini greece zho lадznia mendox, zaatne ngadoo zho.

### Leñ dze ne ziaadyob nitlo guidzliu

**3** Ni none gacnan luu ganle, zeene laa dze ziaadyobpaa nitlo guidzliu, nroob nac guielnë ne gan grë zha ne no xnëz Dios. <sup>2</sup>Zrieequia grë zha ne: gacladz tebaa lose zho yquiin grëtaa ncuaane no, loxaque dimi gleynie zho, niats gac zho, zdaannie zho ncuaane ni rapd zho, zneenë zho Dios, gond zho xtiidz pxoz zho, xtiidz xnias zho; sacd zdoo zho mine gun miech lo zho, laa zho gban zigne notaa guic zho, ib yquiaadiagd zho Xtiidz Dios.

<sup>3</sup>Gacnandraa zho pe nac guielwleynie, ib yquiad zdoo zho, loxaque diidz gzhixcuaa zho, lëbd zho gnabey zho xcuerp zho, sacci zho samiech zho, stsidil zho grëse ncuaane rquuin,

<sup>4</sup>zgo zho zha ne ndzieeldiidz zho nia zha ne quin zho, ni lalnu guielto tsod lo zho, loxaque dien zha gdeed guxt xcuerp zho tso zho, laa ne yguib zho xnëz Dios.

<sup>5</sup>Squiaalo zho ye zho rliladz Dios, per lo grë ncuaane gun zho, ga glu ne rliladzd zho me.

Bien, ib ctsieelsad luu grë miech ne sca nac. <sup>6</sup>Sac lëë zha ne nacgrë zho ga, rzëëb yu rietsitnie grë wnaa yozh ne zienal ncuaane gdeedtaa guxt xcuerp. <sup>7</sup>Tibaque no zho dieen peraa rseed zho, per ib rioguidc zho mine nac diidzli.

<sup>8</sup>Zigne been chop zha ne biil diidz dox padzeela, Janes grop Jambres, gocndaan zho lo Moisés; scaque run zha co niina, rlëëniedox zho mine nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios; <sup>9</sup>per gacdaquew xtse, zeene laa diidz guien ganle pe clas miech nac zho, dzigo lëëque grë ncuaane yozh ne run zho cuee xquielto zho; zigne bzhaacaque zha ne sca blëënie Moisés.

### Csaand Timoté mine pseed me

<sup>10</sup>Sangu luu, nanle luu ganle zha nac grë mine pseed naa luu. Wen wen nan luu ganle zha mban naa, pe no guic naa gun naa, zha dib zdoo naa rliladz naa Dios, zha dib zdoo naa rleynie naa samiech naa, rieednied naa zho. <sup>11</sup>Nanle

luu ganle zha rneedz Dios xfuerz naa, rlëeb naa grëtaa mine rteed miech naa, zig been zho naa guiedz Antioquí, guiedz Icon ni Listr, blactaa pquianał zho naa; per tibaque gocnie Dios naa, psilaa me naa lo grëtaa guielxtseeb co. <sup>12</sup>Ni scagaa naca, grë zha ne rquiabladz gban zigne rnabey Jesús, ible squianał miech zho.

<sup>13</sup>Probsaxe grë zha ne sca quiayunctal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa mendox zho.

<sup>14</sup>Sangue luu gon, csaand luu grë mine pseed luu. Nanween luu ganle diidzliw, ni runbeygaa luu cho nac grë zha ne bneew lo luu. <sup>15</sup>Ni stiba, zigne ziadroob luu psilo quiaseed luu Xtiidz Dios, ni lëew bdixbiini guic luu gocnan luu ne Jesús none gliladz miech parne laa zho lo dol. <sup>16</sup>Dib nacse Xtiidz Dios, Espíritu Sant psiaaba guic zha ne pquiaaw, laaw biaan:

rseeda ne mine nac diidzli,  
rsow diidz lo ne guien ne pa lo quiaxin ne,  
rseeda ne zaacse gban ne.

<sup>17</sup>Zeeña sca grëse zha ne no xnëz Dios, grieelo wen wen cseed zho, ni guien zho zha gun zho grëse dziin ne rquiin, dziin ne rieguial zho gun zho.

#### None gnee Timoté Xtiidz Dios

**4** <sup>1-2</sup>Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men gunquizh miech grëtaa ncuane been zho, zigtaa zha ne mbana zigtagaa zha ne gutlew, zeene gdzin dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyun zho, ni scagaa bloonley zdoo zho.

Bioxco tibaque pseed zho, ib guieednied luu zho. <sup>3</sup>Sac gon, zdzin dze ne siguieldraa miech yquiaadiag zho mine nac diidzli; sinque laa zho yquiaguib zhaase zhaase dien cho cseed zho tel pe nac ncuane rdziladzse zho yquiaadiag zho. <sup>4</sup>Gleynied zho Xtiidz Dios, laa ne yquiaadiag zho mine nac xtiidz me, lel laa zho tsoxco yquiaadiag zho grë mine nac zhiwseed miech guidzliu. <sup>5</sup>Sangue luu gon, nsin bzo gdeete luu diidz gungüet zho luu. Zaacse been grë mine pso Dios luu gun luu, bnee lo miech zha laa zho lo dol; niicle tel pe nactaa guielnë ne noded luu, gacmband luu.

<sup>6</sup>Rien naa ziaadyoble ne laa naa gbi lo guidzliu rii, zhile gdzin dze ne laa zho gut naa. <sup>7</sup>Len ngbidz ne wban naa, tibaque dib zdoo naa bliladz naa Dios; xtsiin mew, laaw ben naa zigne bnabey me naa, ni laaw psiaalga naa niina. Zigne runda grë menguub ne rie lo dil, sca bleeladz naa naa ben naa xtsiin me; <sup>8</sup>laa na nagon, mine quiambëzse naa nac premio ne no gneedz me lo naa. Lëe premio co gneedz me gal dze ne guiaad me guiaadgun me guielwxtis; ni led loxaque naadse ygaaw, sinque grëse zha ne rleynie me, grë zha ne dib zdoo quiambëz gdzin dze ne guiaad me stib, grëse zha co yga premio co.

### Tsienio**b** Timoté

<sup>9</sup>Bzhiguiel guiaadniob luu guiaadgan luu naa nu; <sup>10</sup>sac zig nac Demas, laa me bichele lo naa. Psanaque me naa nu laa me zie nêz Tesalónica; sac mazdraa nonie grê ncuaañe lo guidzliu rii guic me. Bay zig nac Crescent, laa me briece zie me nêz Galás; Tit na, zieegaa nêz Dalmás; laa zho zie zaatne nacle diidz tsie zho. <sup>11-12</sup>Niicle Tic guiend nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguiib luu Marcw, zeene laa luu guiaad nêz rii bzhiguiel guiaadnie luu me; sac rquiin me nu gun me xyudar naa lo xtsiin Dios. <sup>13</sup>Ni psoladzpaa guiaadnie luu lar ne rbiix naa, mine psan naa guiedz Troas lidz Carp; ni guiaadnie luu grê xquits naa. Ib guiaanladzd luu mine nac grê guits nroob ga.

<sup>14</sup>Tei gan luu ganle nzian ncuaañe nonguieldraa been Lejandr naa, men ne nac wncadzguiib ga; per Diostaa nan zha gunquizh me Lejandr grê mine been Lejandr ga. <sup>15</sup>Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

<sup>16</sup>Zeene glopaa gocredz naa lo wxtis, choot bzêd nriee xfavor naa, grêse zho biche lo naa; rnab naa lo Dios gunquizhd me zho mine been zho, sca psaan zho naa. <sup>17</sup>Sangue men ndzon ne rnabey ne psaand me naa, me pchoobladz zdo naa, haxta bdeeda diidz bnee naa Xtiidz me lo grê zha zit rii. Sca gocniên me naa, gun naa cuent role meedz psilaa me naa; <sup>18</sup>ni niicle niinagaa, nanle naa ne ib silaa me naa lo grêtaa ncuaañe racladz miech cteed zho naa, ni me yquiaanap naa haxta gal dze ne laa me gdzinnie naa zaatne rnabey me gbaa. ¡Me riegua! guiaan non gzataa dze, niicle nadzew, gzhew, ni grêragaa len izdoo ne ziaada!

<sup>19</sup>Bzhiguiel bdeed tib zhibdiuzh naa lo Aquil i grop Priscil, ni lo grê zha ne no lidz Onesifr. <sup>20</sup>Gacnan to ganle, laa bets ne Rast biaan Corinth, laa Trófimo biaan guiedz Milet, sac rzacnê me.

<sup>21</sup>Bioxco gon guiaadniob luu, zeena blansole luu nêz rii zeene laa mëe nal sëeb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grêragaa zha bets ne, zha bzian ne, zha ne no nêz rii, laa zho rxeel bdiuzh lo luu.

<sup>22</sup>Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grêse to! *Pabl*